



Ciorclán 0061/2021

Chuig: Príomhfheidhmeannaigh na mBord Oideachais agus Oiliúna

**SAOIRE STAIDÉIR AGUS SCRÚDUITHE DO BHAILL FOIRNE
SEACHAS DAOINE ATÁ FOSTAITHE MAR MHÚINTEOIRÍ AGUS
CÚNTÓIRÍ RIACHTANAS SPEISIALTA I mBOIRD OIDEACHAIS
AGUS OILIÚNA**

Ordaíonn an tAire Oideachais duit cur chun feidhme a dhéanamh ar na rialacháin agus na nósanna imeachta maidir le saoire staidéir agus scrúduithe do gach ball foirne incháilithe seachas daoine atá fostaithe mar mhúinteoirí/chúntóirí riachtanas speisialta a gcistítear a bpost go hiomlán le hairgead ón Oireachtas.

Tá na rialacháin agus na nósanna imeachta atá leagtha amach sa chiorclán seo le cur chun feidhme ag gach fostóir le héifeacht láithreach agus ní mór do gach ball foirne, seachas daoine atá fostaithe mar mhúinteoirí/chúntóirí riachtanas speisialta, cloí le téarmaí an chiorcláin seo.

Gabhann an chiorclán seo in ionad gach chiorcláin, meabhráin, rialach, rialacháin agus socraithe roimhe i ndáil le saoire staidéir agus scrúduithe do gach ball foirne, seachas daoine atá fostaithe mar mhúinteoirí/chúntóirí riachtanas speisialta i mBoird Oideachais agus Oiliúna.

Cinntigh go dtarraingeofar aird na mball foirne ar gach grád, seachas na baill foirne sin atá fostaithe agat mar mhúinteoirí/chúntóirí riachtanas speisialta, lena n-áirítear iad sin atá as láthair le cead, ar chóipeanna den chiorclán seo.

Ba cheart ceisteanna a chur ar an gcéad dul síos chuig hr@etbi.ie lena gcóimheas agus ba cheart iad a chur ar aghaidh chuig an Roinn Oideachais nuair is cuí.

Is féidir teacht ar an gCiorclán seo ar shuíomh Gréasáin na Roinne ag www.gov.ie/education

Teresa McNeill
Príomhoifigeach
Rannóg Pearsanra Airgeadais agus Riaracháin an BOO
Nollaig 2021



Saoire Staidéir agus Scrúduithe do bhaill foirne seachas daoine atá fostaithe mar Mhúinteoirí/Chúntóirí Riachtanas Speisialta

Sainmhínte:

Chun críocha na scéime seo, beidh an bhrí a shanntar dóibh anseo leis na téarmaí seo a leanas sa chiorclán seo, ach amháin i gcás go léiríonn an comhthéacs a mhalairt:

An Roinn – ciallaíonn sé seo an Roinn Oideachais.

Fostóir – ciallaíonn sé seo Bord Oideachais agus Oiliúna.

Fostaí – ciallaíonn sé seo ball foirne de chuid Boird Oideachais agus Oiliúna, seachas daoine atá fostaithe mar mhúinteoir/chúntóir riachtanas speisialta, ar ball foirne é atá ag fáil tuarastail faoi chonradh buan, faoi chonradh tréimhse éiginnte nó faoi chonradh téarma shocraithe, mar a shainmhínítear san Acht um Chosaint Fostaithe (Obair Téarma Shocraithe), 2003.



1. Faisnéis Ghinearálta

- 1.1 Ní mór réamhceadú an fhostóra a iarraidh agus a bheith deonaithe i leith gach tréimhse neamhláithreachta faoin gclár seo.
- 1.2 Déanfaidh gach fostóir, mar chuid de bheartas foriomlán neamhláithreachta um thréimhsí neamhláithreachta fostaithe, ráiteas beartais a fhorbairt agus a choinneáil atá sonrach do riachtanais na heagraíochta i dtaca le saoire staidéir agus scrúduithe a cheadú agus ba cheart don fostóir a fhoráil gur féidir freastal ar na costais laistigh de bhuiséad forbartha gairmiúla leanúnaí an Bhoird Oideachais agus Oiliúna.
- 1.3 Agus an beartas sin á dhréachtú, tabharfar tús áite do riachtanais oibriúcháin an fhostóra thar gach breithniúchán eile agus ba cheart tréimhsí neamhláithreachta a choinneáil chomh híseal agus is féidir chun cur isteach ar sholáthar seirbhíse a sheachaint.
- 1.4 Measfar gur saoire neamhceadaithe í aon tréimhse neamhláithreachta nach bhfaightear ceadú an fhostóra ina leith, déileálfar léi faoi nósanna imeachta araíonachta agus d'fhéadfadh go scoirfí de thuarastal a íoc dá barr.
- 1.5 Ní rachaidh tréimhsí neamhláithreachta ceadaithe níos faide ná fad chonradh fostaíochta an fhostaí.
- 1.6 Ba cheart asbhaintí as neamhláithreachta neamhíochta aonlae a ríomh ag ráta atá cothrom le cúigiú amháin den phá seachtainiúil.

2. Saoire Staidéir Íochta

- 2.1 Féadfar saoire staidéir a dheonú d'fhostaithe atá ag tabhairt faoi bhreisoideachas agus faoi bhreisfhorbairt. Beidh deonú aon saoire staidéir íochta nó aon saoire scrúduithe íochta faoi réir na rialachán um shaoire a dheonú go ginearálta.

2.2 Incháilitheacht

Maidir le fostaithe atá ag tabhairt faoi chúrsaí breisoideachais nó ardoideachais ina n-am saor féin le haghaidh cáilíochtaí a rachaidh, i dtuairim an Bhoird Oideachais agus Oiliúna, chun tairbhe don fhostaí go díreach le linn dó/di a d(h)ualgais oifigiúla a chomhlíonadh i róil reatha agus i róil sa todhcháí, féadfar saoire staidéir íochta a cheadú dóibh le linn an chúrsa.



2.3 Teidlíocht

Cúrsa Breisoideachais nó Leibhéal 6

- a) Trí lá i leith gach bliana de chúrsa breisoideachais nó Leibhéal 6 (de réir an Chreata Náisiúnta Cálíochtaí), faoi réir deich lá ar a mhéad ar an iomlán.

Cúrsa céime príomhúla nó fochéime/iarchéime

- b) Cúig lá i leith gach bliana de chúrsa céime príomhúla nó fochéime/iarchéime.
- c) Deich lá i leith na bliana deiridh, agus i leith na bliana sin amháin, de chúrsa céime príomhúla nó fochéime/iarchéime tríú leibhéal.
- d) Féadfaidh an Bord Oideachais agus Oiliúna dhá lá bhreise a dheonú freisin i ngach bliain den chúrsa, gan an ghnáthshaoire staidéir cúig lá a áireamh, chun cabhrú le freastal éigeantach ar scoileanna cónaithe ar mhaithe le comhlíonadh páirteach a dhéanamh ar na ceanglais le haghaidh céim a ghnóthú trí chianfhoghlaim; ní féadfar na laethanta breise sin a dheonú ach amháin i leith laethanta ar a bhfuil an t-oifigeach le bheith ar dualgas;
- e) Féadfar cead a thabhairt d'fhostaithe suas le cúig lá de shaoire staidéir íoctha ón dara bliain ón deireadh a thabhairt ar aghaidh chuig an mbliain deiridh de chúrsa.
- f) Maidir le fostaithe nach bhfuil ag freastal ar an gcúrsa iomlán/ag tabhairt faoin gcúrsa iomlán (i.e. fostaíocht pháirtaimseartha) i mbliain ar leith, laghdófar an tsaoire staidéir sin ar bhonn pro-rata.
- g) Beidh feidhm ar bhonn pro-rata ag saoire staidéir d'fhostaithe atá ag baint leas as socruithe comhroinnt oibre.
- h) Ní cheadófar saoire staidéir íoctha i leith aon bhliana ar gá scrúdú a athdhéanamh inti.
- i) Ní mór an cúrsa a bhfuil saoire staidéir íoctha á iarraidh ina leith a bheith bliain acadúil amháin ar fad ar a laghad.

Ba cheart a thuiscint ó na tagairtí thuas do “gach bliain den chúrsa” nach gclúdaíonn siad ach gnáthfhad an chúrsa mar atá sainithe ag an institiúid acadúil iomchuí. Ní hionann an fad sin i ngach cás agus an fad ama a thógann an duine chun an cúrsa a chur i gcrích. Mar shampla, más rud é go bhfuil oifigeach ag tabhairt faoi chúrsa dhá bhliain ach go mbaineann sé/sí leas as roghanna chun na modúil a leathadh thar thréimhse is faide ná dhá bhliain, is í deich lá an uastréimhse saoire staidéir íoctha atá ar fáil don oifigeach sin thar an tréimhse.



3. Saoire Scrúduithe Íoctha

3.1 Ceadófar Saoire Scrúduithe íoctha le haghaidh scrúduithe a dhéanamh do chúrsaí ar ceadaíodh saoire staidéir íoctha ina leith.

3.2 Teidlíocht

- a) Ba cheart an tréimhse neamhláithreachta íoctha a bheith teoranta i ngach cás don lá/leathlá nó do na laethanta/leathlaethanta is gá a chaitheamh ag na scrúduithe.
- b) Ní dheonófar saoire scrúduithe íoctha i gcás gur gá scrúdú a athdhéanamh.

4. Saoire Staidéir Neamhíoctha agus Saoire Scrúduithe Neamhíoctha

4.1 Féadfar saoire staidéir neamhíoctha a dheonú d'fhostaithe atá ag tabhairt faoi bhreisoideachas agus faoi bhreisfhorbairt. Beidh deonú aon saoire staidéir neamhíoctha nó aon saoire scrúduithe neamhíoctha faoi réir na rialachán um shaoire a dheonú go ginearálta.

4.2 Incháilitheacht/Teidlíocht

- a) Féadfar saoire staidéir neamhíoctha a thógáil ar feadh tréimhse suas le trí mhí ar fad chun críche staidéir nó chun críoch eile atá ábhartha go díreach don chúrsa a bhfuiltear ag tabhairt faoi.
- b) Is é Príomhfheidhmeannach an Bhoird Oideachais agus Oiliúna a chinnefidh cé acu a dheonófar nó nach ndeonófar saoire staidéir neamhíoctha.
- c) Maidir le fostaithe ar mian leo tabhairt faoi chúrsaí a bhfuil neamhláithreacht rialta nó leanúnach ó dhualgais oifigiúla i gceist leo, féadfar iad a éascú faoi na scéimeanna sos gairme nó comhroinnt oibre, faoi réir na dtéarmaí atá i réim ag an am.
- d) Féadfaidh suas le bliain acadúil amháin a dheonú d'fhostaí incháilithe chun cur ar a c(h)umas tabhairt faoi chúrsa iarchéime nó faoi chúrsa speisialaithe staidéir, ar choinníoll gur deimhin le Príomhfheidhmeannach an Bhoird Oideachais agus Oiliúna go rachaidh an cúrsa chun tairbhe don fhostaí go díreach le linn dó/di a f(h)eidhmeanna oifigiúla a chomhlíonadh, agus ar choinníoll gur thug an t-oifigeach tréimhse réasúnach seirbhíse cheana féin ina g(h)rád reatha.

5. Tuilleadh Faisnéise

5.1 De réir na míre réamhléirithí, tá na rialacháin agus na nósanna imeachta sa chiorclán seo le cur chun feidhme ag an bhfostóir. Ba cheart gach ceist a chur ar dtús ar Aonad Acmhainní Daonna an fhostaí.